

**Gipuzkoako
Aldizkari
Ofiziala**



**Boletín
Oficial de
Gipuzkoa**

111

2022ko ekainaren 13a, astelehena

1

GIPUZKOAKO LURRALDE HISTORIKOKO XEDAPEN OROKORRAK

GIPUZKOAKO FORU ALDUNDIA

OGASUN ETA FINANTZA DEPARTAMENTUA

316/2022 Foru agindua, ekainaren 2koa, zeinaren bidez onesten baitira 490 eredia, «Zenbait zerbitzu digitalen gaineko zerga. Autolikidazioa» izenekoa, eta hura aurkezteko eta diru-sarrera egiteko moduak.

Euskal Autonomia Erkidegoarekiko Ekonomia Ituna onartzen duen maiatzaren 23ko 12/2002 Legeak aldaketak izan ditu berriki onartu den otsailaren 8ko 1/2022 Legearen bidez; izan ere, besteak beste, zenbait zerbitzu digitalen gaineko zerga hitzartu da lege hori dela medio. Egindako aldaketak 34 ter artikulua gehitu dio Ekonomia Itunari, aplikatzekoak diren konexio puntuak arautzeko. Artikulu horrek dio zerga hori Estatuak une bakoitzean ezartzen dituen arau substantibo eta formal berberak aplikatuta arautuko dela, eta bertan finkatu egiten da zer irizpide aplikatuko diren administrazio desberdinek tributua ordainarazi eta ikuskatzeko eskumena baliatu dezaten. Foru agindu honen xedearekin zuzenean lotuta egoteagatik, nabarmendu behar da ezen 34 ter artikulua horretan honako hau zehazten dela: lurralde historikoetako erakunde eskudunek ahalmena izango dute aitorten eta ordainketa ereduak onartzeko eta likidazio aldi bakoitzeko ordainketa epeak zehazteko. Baina, eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ezingo dira izan Estatu Administrazioak ezarritakoez oso bestelakoak.

Ekonomia Itunaren lehen xedapen gehigarriak esaten du lurralde historikoetan eskumena duten erakundeek ekonomia ituna aplikatzeko beharrezkoak diren xedapenak ematen ez dituzten artean, lurralde erkidean indarrean dauden arauak aplikatuko direla, eta arau horiek zuzenbide osagarri izango direla beti.

Gainera, aipatutako 1/2022 Legeak aldaketak sartu ditu informazio betebeharrak arautzen dituen artikuluan, zenbait zerbitzu digitalen gaineko zergaren zentsu aitortenak zergadunaren zerga egoitzari dagokion administrazioan aurkeztu beharra ezartzeko.

Urriaren 15eko 4/2020 Legeak, zenbait zerbitzu digitalen gaineko zergarenak, aurreikusten du zenbait zerbitzu digitalen prestazioak zergapetzea haietan erabiltzaileak partaide direnean, parte hartze horrek zerbitzuak ematen dituen enpresaren balioa sortzeko prozesuari ekarpena dakarkionean, eta enpresak, zerbitzu horien bidez, erabiltzaileen ekarpen hori monetizatzen duenean. Zehazki, lege horren 4. eta 5. artikuluetan xedatutakoaren arabera, zerbitzu digital hauek izango dira zergapetuak aipatutako lege testuan finkatutako moduan eta baldintzetan: lineako publizitate zerbitzuak, lineako bitartekaritza zerbitzuak, eta datuak transmititzeko zerbitzuak.

14. artikulua. arabera, zergaren likidazio aldia hiruhileko naturala izango da, eta zergadunek agindu bidez ezarritako tokian, moduan eta epeetan bete beharko dute zerga autolikidatzeko obligazioa.

Hortaz, foru agindu honen xedea da zenbait zerbitzu digitalen gaineko zergaren autolikidazioa aurkezteko erabiliko den 490 eredia onestea, eta hiruhileko autolikidazio horiek aurkezteko eta diru-sarrera egiteko epea eta moduak ezartzea.

Alde horretatik, hiruhileko bakoitza amaitu ondorengo hilabeteen lehen 25 egun naturalak finkatzen dira autolikidazioa aurkezteko eta diru-sarrera egiteko epe gisa.

Eredua Internet bidez aurkeztuko da, Zergabidea plataforma erabilia, zeinaren bidez posible izango baita eredia plataformak berak horretarako eskatzen dituen datuak betez prestatzea.

Autolikidazioaren diru-sarrera egiteko, bere aldetik, Gipuzkoako Lurralde Historikoko Zergen Foru Administrazioarekiko harremanetan bitarteko elektronikoak erabiltzeko obligazioa arautzen duen ekainaren 28ko 320/2017 Foru Aginduan xedatutakoari jarraituko zaio. Hortaz, eredia aurkezteko, helbideratze kontu bat adierazi beharko da bertan, eta, gainera, behin autolikidazioa transmititu ondoren, beste bi modu ere hautatu ahal izango dira diru-sarrera egiteko: bitarteko elektronikoak, ordainketa-pasabidearen bidez, edo aurrez lortutako ordainketa-gutuna entitate laguntzaile batean aurkeztuz.

Foru aginduaren xedapen gehigarri bakarrak, bere aldetik, autolikidazioak erregularizatzeko prozedura arautzen du, hain zuzen ere, urriaren 15eko 4/2020 Legeak, zenbait zerbitzu digitalen gaineko zergari buruzkoak, 10.3 artikuluan aipatzen duena. Lege xedapen horretan aurreikusten den erregularizazioa egingo da zergadunak likidazio aldian zerga oinarria zein den jakin ez duenean. Horrelakoetan, zergadunak behin-behineko zerga oinarri bat finkatu behar du, baina horrek ez du galaraziko erregularizazioa egitea zenbatekoa ezagutzen denean. Aurkeztutako autolikidazioak erregularizatzeko, erregularizazioen atal espezifikoan aurreikusitako edukia eta zehaztapenak beteko dira autolikidazio eredian, baina horrek ez du galaraziko dagozkion berandutze interesak sortzea. Erregularizazio hori eragiketari dagozkion zergaren sortzapen datuen ondorengo 4 urteko epean egin beharko da beranduenez.

Horrenbestez, hau

XEDATZEN DUT

1. artikulua. 490 eredia onestea.

Onetsita geratzen da 490 eredia, «Zenbait zerbitzu digitalen gaineko zerga. Autolikidazioa» izeneko, foru agindu honetan eranskin gisa ageri dena.

2. artikulua. 490 eredia aurkeztera behartuak.

Zenbait Zerbitzu Digitalen gaineko Zergari buruzko urriaren 15eko 4/2002 Legearen 8. artikuluan aipatzen diren zergadunak daude behartuak 490 eredia aurkeztera eta dagozkion diru-sarrera egitera.

3. artikulua. 490 eredia aurkezteko eta diru-sarrera egiteko epea.

1. Likidazio aldia hiruhileko naturala izango da.

2. 490 eredia apirileko, uztaileko, urriko eta urtarrileko lehen 25 egun naturaletan aurkeztu eta ordainduko da, urte naturaleko lehen, bigarren, hirugarren eta laugarren hiruhilekoetako likidazio

aldiei dagokienez, hurrenez hurren.

3. Hiruhilekoetako bat likidatzean ordaindu beharreko kuotarik ez aterata ere, zergadunak beti aurkeztu beharko du zergaren aitortpena.

4. artikulua. 490 eredua aurkezteko modua.

490 eredua internet bidez aurkeztuko da, Zergabidea plataformatik, betiere Gipuzkoako Lurralde Historikoko Zergen Foru Administrazioarekiko harremanetan bitarteko elektronikoak erabiltzeko obligazioa arautzen duen ekainaren 28ko 320/2017 Foru Aginduan jasotakoaren arabera.

Aurkeztu beharreko eredua prestatzeko, Zergabidea plataformak berak eskatutako datuak bete beharko dira.

Zergabidea plataforma <https://zergabidea.gipuzkoa.eus> atarian dago eskuragarri. Era berean, Gipuzkoako Foru Aldundiaren egoitza elektronikotik ere sartu ahal izango da bertara, <https://egoitza.gipuzkoa.eus> helbidearen bitartez, edo, bestela, Ogasun eta Finantza Departamentuaren webgune ofizialetik, <https://www.gipuzkoa.eus/eu/web/ogasuna/> erabiliz.

5. artikulua. 490 ereduan diru-sarrera egiteko prozedura.

1. 490 ereduaren autolikidaziotik ondorioztatzen den kuota ordaintzeko, prozedura hauetako edozein erabili ahal izango da ekainaren 28ko 320/2017 Foru Aginduak, Gipuzkoako Lurralde Historikoko Zergen Foru Administrazioarekiko harremanetan bitarteko elektronikoak erabiltzeko obligazioa arautzen duenak, 4. artikuluan xedatutakoari jarraituz:

1.a. Helbideratze agindua, ordainketa helbideratzeko hautatutako banku kontuaren nazioarteko IBAN kodea adieraziz. Ondorio horietarako, helbideratze kontuek entitate laguntzaileetan irekita egon beharko dute.

2.a. Ordainketa-pasabidea, abenduaren 11ko 1074/2008 Foru Aginduak, Gipuzkoako Foru Aldundiko zuzenbide publikoko sarrerak ordainketa-pasabidearen bidez ordaintzea arautzen duenak, xedatutakoarekin bat (azaroaren 9ko 605/2021 Foru Aginduak aldatua), edo

3.a. Entitate laguntzailea, ordainketa-gutuna bertan aurkeztuta. Ordainketa-gutun hori Zergabidea plataformatik bertatik edo egoitza elektronikotan eskuragarri dagoen zerbitzua erabiliz eskuratu ahal izango da; nolahi ere, zergadunak edo haren ordezkariak posible dute, baita ere, Gipuzkoako Foru Aldundiko Ogasun eta Finantza Departamentuko herritarren arretarako edozein bulegotara joatea eta ordainketa-gutuna bertan eskatzea.

Edonola ere, diru-sarrerak ez badira bankutik helbideratzen, ordainketa aurreko 3.2 artikuluan aurreikusitako epea amaitu baino lehen egin beharko da.

2. Ordainketa ez bada ezarrita dagoen epean egiten, bide exekutiboa hasiko da, hala xedatzen baitu martxoaren 8ko 2/2005 Foru Arauak, Gipuzkoako Lurralde Historikoko Zergen Foru Arau Orokorak, 165.1.b) eta 165.3 artikuluetan.

Xedapen gehigarri bakarra. Zenbait Zerbitzu Digitalen gaineko Zergari buruzko urriaren 15eko 4/2020 Legearen 10.3 artikuluko autolikidazioak erregularizatzeko prozedura.

Aurkezten diren likidazioen zerga oinarria behin-behinekoa bada Zenbait Zerbitzu Digitalen gaineko Zergari buruzko urriaren 15eko 4/2020 Legearen 10. artikuluen 3. paragrafoan xedatutakoaren arabera, erregularizazioa egingo da zerga oinarriaren zenbatekoa zein den ezagutzen den epealdiko autolikidazioan, erregularizazioen atal espezifikoan aurreikusitako edukia

eta zehaztapenak adierazita.

Erregularizazio hori eragiketari dagokion zergaren sortzapen dataren ondorengo 4 urteko epean egin beharko da beranduenez.

Aurrekoa gorabehera, autolikidazioa aurkezteko unean zergapekoa jada ez bada zergaren zergadun, behartuta egongo da behin-behineko zerga oinarriarekin aurkeztutako autolikidazioa (k) erregularizatzera, autolikidazio osagarriak eta/edo zuzenketa eskaerak aurkeztuz eta agindu honen eranskinean aurreikusitako edukia eta zehaztapenak adieraziz.

Azken xedapen bakarra. Indarrean jartzea eta aplikatzea.

Foru agindu hau Gipuzkoako ALDIZKARI OFIZIALEAN argitaratu eta hurrengo egunean jarriko da indarrean, eta 2022ko bigarren hiruhilekoari dagozkion autolikidazioei aplikatuko zaie lehen aldiz, aurkezteko epea 2022ko uztailaren 1ean hasten dena.

Donostia, 2022ko ekainaren 2a.—Ogasuna eta Finantza Departamentuko foru diputatua.
(3825)

ERANSKINA

